

2004KO AZAROAREN 25EKO **OHIKO OSOKO BILKURA**

Lazkaoko Udaletxean, bi mila eta lauko azaroaren hogeita bostean, iluntzeko zazpietan, Lazkaoko Udal Osoa biltzen da, aurrez honetarako deialdia egin delarik, Felix Urkolla Iriarte Alkatearen lehendakaritzapean, ohiko batzaraldia egin asmoz.

Bertaratutako zinegotziak honako hauek dira: Xanet Barreras Jauregi, Arantxa Zumelaga Agirre, Inazio Barandiaran Aldasoro, Amagoia Naldaiz Mingo, Kepa Goenaga Alikostes, Gorka Lamy Insausti, Juan Manuel Serna Portugal, Milagros Alvarez Novoa eta Angel Olaso Villalba.

Igor Sarriegi Zumarraga zinegotzia ez da bertaratu.

Aktan adieraziko dira Xabier Arrasate Aierbe eta Inazio Estensoro Eskisabel zinegotziak bertaratzen direneko uneak.

Idazkari lanetan Iñaki Eskisabel Zurututzak dihardu.

I.- AURREKO AKTA.-

Alkateak bilkurari hasiera eman ondoren, bertaratutakoen onespenera aurkezten da 2004ko urriaren 28an egindako bilkurako akta, idatzita dagoen moduan onartzen delarik.

II.- ALKATETZAREN EBAZPENEN BERRI EMATEA.-

Ondoren Alkateak azken Osoko Bilkuratik gaur arte emandako Alkatetzaren Ebazpenen berri ematen du, ebazpen hauen zenbakizko laburpen baten bidez.

Osoko Bilkura jakinaren gainean gelditzen da.

III.- 2003KO KONTU OROKORRA.-

2003 ekitaldiko Kontu Orokorra Kontuetaarako Batzorde Berezian aurkeztu zen, 2004ko irailaren 28an honek egindako bilkuran.

Ondoren jendaurreko erakustaldian jarri zen, iragarkia Udaletxeko iragarki oholean eta 2004ko urriaren 14ko Gipuzkoako Aldizkari Ofizialean argitaratu zelarik. Jendaurrean egon den 15 lanegunetan ez da inolako erreklamaziorik aurkeztu.

Ondoren 2003ko Kontu Orokorrak hau berrituz Kontuetaarako Batzorde Bereziak aztertu eta informatua izan da 2004ko azaroaren 16ko bilkuran.

Hau honela, dagokion legeriak dioena jarraiki, Osoko Bilkurak, bertaratutako bere partaide guztien aldeko botuekin, 2003 ekitaldiko kontu orokorra onartu egiten du.

Une honetan Xabier Arrasate Aierbe zinegotzia bertaratzen da.

IV.- 1 SEKTOREKO PLAN PARTZIALAREN BEHIN BEHINEKO ONARPENA.-

1 Sektoreko Plan Partzialaren udal izapidatzearen barruan, 2004ko urriaren 5eko Osoko Bilkurak behin behineko onarpena eman zion eta jarraian espedientea Gipuzkoako Foru Diputaziora bidalia izan zen honek behin betiko ebazpenari buruz ebatz zezan.

Gipuzkoako Foru Diputaziotik jakinarazi zaigu izapidatzean akats bat dagoela eta horren zuzenketa eskatu du. Gipuzkoako Foru Diputazioak akatstzat jotzen duena honako hau da: haserako onarpenaren iragarkia 2004ko irailaren 14ko Gipuzkoako Aldizkari Ofizialean eta 2004ko irailaren 15eko Berria eta Deia egunkarietan argitaratu zen; 2004ko irailaren 28ko Gipuzkoako Aldizkari Ofizialean eta 2004ko irailaren 23ko Berria eta Deia egunkarietan akatsen zuzenketa iragarkia argitaratu zen berriz; jendaurreko erakuste denboraldia akatsen zuzenketa iragarkia argitaratu zenetik kontatzen hasita egin behar dela dio Foru Aldundiak, eta behin betiko onarpen akordioa hartu zenean epe hori oraindik amaitzeko zegoen.

Udal honek ez du hori horrela denik uste, baina behin betiko onarpena ematearen ahalmena Diputazioarena da, eta honek behin-behineko akordioa akatsen zuzenketa iragarkia argitaratu zenetik kontatzen hasitako epe hori amaitu ondoren hartu behar dela esan du, hau egin ezean Plana suspensioan utziko duela adieraziz. Honen aurrean, eta gaurko egunez jendaurre erakustaldia amaituta dagoenez denboraldi horretan inolako alegaziorik aurkeztu ez delarik, Osoko Bilkurari 2004ko urriaren 5ean hartutako behin behineko akordioa berrestea proposatzen da.

Honen aurrean, Osoko Bilkurak, 1 Sektoreko Plan Partziala behin behingoz onartzeari buruz 2004ko urriaren 5ean hartutako akordioa berrestea erabakitzen du.

V.- ARAU SUBSIDIARIOEN BERRIKUSKAPEN ABANTZEA.-

Lazkaoko Planeamenduko Arau Subsidiarioen berrikuspen lanek planeamenduko erizpide, helburu eta irtenbide orokorrak formulatzea posibilitatze adinako garapen maila lortu zutela eta, Alkatetzak, 2003ko irailaren 12ko Alkatetzaren Ebazpen bidez lan hauek jendaurrean erakustea erabaki zuen.

Lan hauek 30 eguneko epean jendaurreko erakustaldian egon ziren, iragarkiak 2003ko irailaren 23ko El Diario Vasco eta Berria egunkarietan, eta 2003ko irailaren 19ko Gipuzkoako Aldizkari Ofizialean argitaratu zirelarik

Jendaurreko erakustaldia 2003ko urriaren 28an amaitu zen, eta denboraldi horretan 18 iradokizun jaso dira.

Iradokizun hauen aurrean dokumentuaren idazle teknikariek beraien txostena egin dute. Txostenak zera dio:

1 zbk.dun iradokizuna. Juan Carlos Gonzalez Sepulveda Jn.ak aurkeztutakoa.-

Iradokizunaren edukia

Iradokizun idatzian San Prudentzio 11n kokatutako Vista Alegre etxeari erantsitako pabilioia bifamiliko etxebizitzarekin ordezkatzeari eskatzen da.

Kontsiderazioak

Aurkeztutako iradokizuna aztertuta bere kontsiderazioa kokatzen den gunearen baterako azterketarako uztea egoki ulertzen da, berau urbanizatze prozesuan barneratzea egoki ikusten den momentuan. Aurrerapen agirian zoru ez urbanizagarri bezala sailkatzen denez, proiektu honetan aurkeztutako iradokizuna ez kontsideratzea proposatzen da.

Ondorioak

Aurkeztutako iradokizuna ezestea proposatzen da.

2 zbk.dun iradokizuna. Rufino Mujika Mendia Jn.ak aurkeztutakoa.-

Iradokizunaren edukia

Aurkeztutako iradokizun idatzian 2 gai azaltzen dira: lehenengoa egungo 10 eta 12 H.A.tan aurrikusitako errotonda eta futbol zelaiaren azpian aurrikusitakoaren artean proiektatutako bide berria, zeinek konbentuko hilerriari eragiten dioenez Beasain aldera lekualdatzea proposatzen den. Bigarrena komunitateak Agauntza errekaaren ezkerrean dituen sagasti eta paseorako lursailarekin egiten den okupazioa, hauek lursail pribatu bezala mantentzea proposatzen da, kontenplazio eta barnebiltzarako.

Kontsiderazioak

Lehenengo gaiaren inguruan -10 eta 12 H.A.tan eta futbol zelaiaren azpian aurrikusitako errotondak lotzen dituen bidea Iparraldera lekualdatzea- ondorengoak adierazi behar dira:

1. Aurrikusitako antolaketa soilik izaera indikatiboa du, eta guneko aurrikuspenak burutzeko beharrezko den garapen planeamenduak bertako bide eskema alda lezake, egokiena, antolaketaren planuan aurrikusten den bezala bere jarraipena bermatzea litzatekeen arren.
2. 10 eta 12 H.A.tako B.E.B.E-ren formula zehatzaren ondorioz, gune honetara eta ondorioz Lazkao erdigunera sartzeko bidea iparralderuntz lekualdatzea aztertzen ari da, "Ibabe" industri poligonoarekin muga eginez eta herrirako sarbideak 10 eta 12 H.A.tatik egin gabe. Honek, eta hirigintza logika jarraituz, bariantea eta Hiribarraren Kalearen arteko lotunearen jarraipena iparralderago egitea eragingo luke, aurkeztutako idatzian proposatzen den bezala, eta ondorioz jarraipen bidearen trazadurak ez lioke hilerriari eragingo.

Bigarren gaiari dagokionez aurkeztutako iradokizuna onartzea edo ez behin-betiko dokumentua idazten denerako geroratzen da.

Ondorioa

Aipatu bidea iparralderuntz lekualdatzea, eta aurkeztutako bigarren iradokizuna onartzea edo ez behin-betiko dokumentua idazten denerako geroratzea proposatzen da.

3 zbk.dun iradokizuna, Javier Peña, Joakin Agirre eta Luisa Arregi Jn./And.ek aurkeztutakoa.-

Iradokizunaren edukia

Aurkeztutako iradokizunak “Bi-Kabi” eta “Gure Txoko” izeneko etxeak kontsolidatzea proposatzen du, errepide sare orokorrak ez eragiteko bide lotuneari beste irtenbide bat bilatzea eskatuz.

Kontsiderazioak

4 eta 9 Burutze Unitateetarako proposatutako antolaketak, nondik Beasaingo mugatik San Jose auzora arteko bidea igarotzen den, azken zatian bereziki “Bi-Kabi” izeneko 30 zbk.dun eraikinari eragiten dio, berau eraistea proposatzen bait da, eta neurri txikiagoan 31 zbk.dun eraikinari. Antolaketa honek izaera orientagarria du, eta guneko bakoitzeko garapen planeamendua izango da bide diseinu zehatza mugatuko duena.

Bestalde, eta bidearen ezaugarriak kontutan hartuta, maila gorenagoko zehaztapena izatea beharrezkoa da bidearen trazadura orokorra zehaztu eta guneko bakoitzera doazen bide zatien arteko koordinazio eta koherentzia, eta osotasunaren funtzionaltasun zuzena bermatzeko.

Zentzu honetan esan, behin-betiko dokumentuak goian adierazitakoarekin bat trazadura orokorraren jarraibideak zehaztu behar baditu ere, hauek garapen planeamenduan zehaztuko direla, behin-betiko irtenbidea ordurarte geroratuz.

Ondorioa

Egungo bide sarea eta proposatutako bide berriaren arteko lotunearen irtenbide zehatza behin-betiko dokumentura eta garapen planeamendura geroratzea proposatzen da.

4 zbk.dun iradokizuna, Jose A. Bereziartu Jn.ak aurkeztutakoa.-

Iradokizunaren edukia

San Prudentzio eta Agerre arteko bidean egun dagoen tailerra etxebizitza bihurtzea proposatzen da.

Kontsiderazioak

Aurkeztutako iradokizuna aztertuta, beronen kontsiderazioa kokatzen den guneko baterako azterketara geroratzea egoki ikusten da, berau urbanizazio prozesuan barneratzea egoki kontsideratu arte. Aurrerapen Agirian zoru ez urbanizagarri bezala sailkatzen denez, aurkeztutako iradokizuna proiektu honetan ez kontsideratzea proposatzen da.

Ondorioa

Aurkeztutako iradokizuna ezestea proposatzen da.

5 zbk.dun iradokizuna, Maria Jesus Vitoria Iturrioz eta Jon Goñi Vitoriak aurkeztutakoa.-

Iradokizunaren edukia

Aurkeztutako iradokizunean 3 gai proposatzen dira:

- a. "Vitoria-Etxea" izeneko eraikinerako sarbidea Berrikuspen dokumentutik garbi zehaztea, idatzian 2 proposamen barneratuz.
- b. Bide berria eta "Vitoria-Etxearen" artean mantendu beharreko distantzia zehaztea.
- c. Antolaketa planuan jasotako igerilekuko aldagelen eraikina kirol partzelaren kontrako aldera lekualdatzea.

Kontsiderazioak

Iradokizun idatzian planteatutako 3 gaiak hain dute izaera zehatza, planeamendu orokorreko dokumentu batek jaso beharreko zehaztapenak gainditzen dituztela. Ondorioz ego-kiago ikusten da aipatu eraikinerako sarbide zehatza, eraikina eta bidearen arteko distantzia eta aldagelen kokapen zehatza, garapen planeamendura nahiz eraikitze proiektuetara geroratzea, azken hau ekipamendu partzelan aldagelak kokatzearen kasuan.

Ondorioa

Planteatutako 3 gaien zehaztapena garapen planeamendura nahiz eraikitze proiektura geroratzea proposatzen da.

6 zbk.dun iradokizuna, Jose Maria Etxeberria Lasa Jn.ak aurkeztutakoa.-

Iradokizunaren Edukia

Aurkeztutako iradokizunean, Elosgi kalean kokatutako erdisotoetan, Hirigintz Arau Orokorrek merkataritza erabilera baimentzea eskatzen da, zehazki 12 eta 18 zbk.en artean.

Kontsiderazioak

Gai horrek Aurrerapen Agiriari dagozkion zehaztapenak gainditzen dituela ulertzen da, eta ondorioz, berau behin-betiko dokumentua idazterakoan aztertu beharko da.

Ondorioa

Aurkeztutako iradokizuna kontsideratzea edo ez behin-betiko dokumentua idazten denerako geroratzea proposatzen da.

7 zbk.dun iradokizuna, Asuncion Auzmendi Odriozola And.ak aurkeztutakoa.-

Iradokizunaren edukia

Aurkeztutako iradokizunean, 120.000 m² inguruko etxebizitza garapena kontsideratzea proposatzen da, Ataundik etortzerakoan bariantearen eskuinaldean kokatutako lursailetan eta ondorengo mugekin: Iparraldean Lazkaomendirako sarbidea, Hegoaldean Enpaundi

baserria, Mendebaldean bariantea eta Ekialdean Argintzano eta Iztueta baserrietako lursailak.

Kontsiderazioak

Hirigintz aldetik garatzeko lursailaren ezaugarri orografikoak, aldapa handiak eta hirigunetik barianteak bananduta, eta bestalde udalerriko beste zenbait gunetan aurrikusitako etxebizitza garapen garrantzitsuak kontutan hartuta, AIU4, AIU9, AIU13 etab., etxebizitza berriak kokatzeko egokiagoak, adierazitako proposamena ez da egoki ulertzen.

Ondorioa

Aurkeztutako iradokizuna ezestea proposatzen da.

8 zbk.dun iradokizuna. Areria Zutabeak aurkeztutakoa.-

Iradokizunaren edukia

Aurkeztutako iradokizun idatzian ondorengo puntuak proposatzen dira.

- a. Proposatutako etxebizitza garapena gehiegizkoa kontsideratzen da, Zubizkitza, Enpaundi, Dorrao, Manuel Ene, Orobione, Iturgaitzaga eta Bionan proposatutako etxebizitzak nahikoa kontsideratuz. Bestalde, egungo merkataritza lokalak eta estalki azpiak etxebizitza bihurtzea eskatzen da.
- b. Kiroldegiairen gainean kirol ekipamendurako beharrezko diren lursailak soilik kontsideratzea eskatzen da, eta Agauntza errekaaren ezkerrean kokatutako lursailak -AIU 4- erreserbarako uztea.
- c. Kanpandegi eta Zubierrekako industri gunek, eta azken hau Amebikoarekin zubi edo gainbide bidez lotzea.
- d. Hirigoien kalean kokatutako parbularioa kentzea ondoko parke handituz, eta San Prudentzio ermitaren inguruko urbanizazioa hobetzea.
- e. Kiroldegiairen gainean kokatutako lursailetan kirol ekipamendurako soilik den lursail erreserba egitea, eta San Prudentzio ikastola eta parrokiaren artean oinezkoen zubia eraikitzea.
- f. "Pastas Arruabarrena" eta Hiribarren kaleko 18 zbk.ren artean kokatutako aparkalekua 3 solairuko etxebizitza batez ordezkatu eta gune horretan kokatzen den kaleari antolamendu aldetik bukaera egokia ematea.
- g. Agauntza errekaaren eskuinaldean soilik kokatutako lursailak kalifikatzea, ezkerrean erreserbarako utziz.

Kontsiderazioak

Etxebizitza kopuruari, eta Agauntza errekaaren ezkerrean kokatutako lursailak eta kiroldegiairen gainekoak egoitzazko bezala ez kalifikatzeari dagokionez esan, 1. Sektorea eta 10. eta 12. H.A.tako Arau Subsidiarioen Aldaketa buruturik, Berrikuspen dokumentuak aurrikusten dituen egoitzazko gune bakarrak, Dorraon eraikitzen ari diren 16 etxebizitzaz eta Manuel-Enen kudeatzen ari diren beste 24 etxebizitzaz gain ondorengoak direla: Zubizkitzan 54 etxebizitza, Enpaundin 144 etxebizitza eta Bionan 65 etxebizitza, guztira 263 etxebizitza izanik. Kopuru hau nahikoa izango ez litzatekeen arren, egia da Iturgaitzaga eta 1. Sektoreko guneak kontsideratuta etxebizitza kopurua 750era igotzen dela. Hau

honela izanik, Berrikuspen dokumentua prestatzeko eginiko bileretan, beti planteatu izan da Agauntza erreka-aren ezker aldearen garapena, AIU 4, eta era berean, kiroldegiaren gainean kokatutako gunearena, biak bidez lotuta daudelarik. Hala ere, gunen hauen garapena aurrez Iturgaitzaga garatzera baldintzatua dago. Guzti honen ondorioz, proposatutako etxebizitza kopurua, Lazkao-Beasain-Ordiziak osatutako triangeluaren beharren esparruan justifikatzen da, eta asmo handikoa den arren, egokia ikusten da udalerrira gainditzeko duen esparru baterako, beti ere Iturgaitzagako gunea aurrez garatzera baldintzatua, honekin lursail horiei nolabaiteko erreserba izaera ematen zaielarik.

Industri gunek gainbideen bidez lotzeari dagokionean, hasera batean nahikoa ikusten da nibelean egiten den proposamena, nahiz eta proposamen hori industri gunen berriak garatzekoan birplanteatu daitekeen.

Parbulario zaharra kentzeari dagokionean esan hasera batean egun funtzio konkretu batzuk betetzen dituela, nahiz eta mugatuak izan, eta ondorioz bere kontsolidazioa gomentatzen da. San Prudentzio ermitaren inguruko urbanizazioari buruz berriz esan dagokion Urbanizazio Proiektua idazteko lanak jadanik esleitura daudela.

San Prudentzio ikastola eta parrokiaren arteko zubiaren kontsiderazioari dagokionean esan berau antolaketa planuetan adierazi dela.

Bariantea, industri poligonoa eta bide nahiz aparkaleku garrantzitsu baten artean egoitza-ko eraikina kokatzeko proposamenari dagokionez, hasera batean ez da egokia ikusten. Hala ere interesgarria ikusten da bariantea eta Hiribarren kalearen arteko emaitza-ko kalearen proposamena aztertzea.

Ondorioa

Agauntza erreka-aren ezker aldean kokatutako lursailen garapena, batez ere Iturgaitzagako gunearen aurretiko garapenera baldintzatzea proposatzen da, nolabaiteko erreserba izaera emanez. Era berean industri poligonoen arteko goratutako lotunea ez kontsideratzea, Hirigoien kaleko parbulario zaharra kontsolidatzea, San Prudentzio ikastola eta parrokiaren artean oinezkoen zubi berri baten aurrikuspenera kontsolidatzea, eta Ibabe poligonoa, bariantea eta Hiribarren arteko kalearen antolaketa berkontsideratzea proposatzen da.

9 zbk.dun iradokizuna. Lore Auzmendi Arozena. Arantxa Auzmendi Arozena eta M^a Dolores Auzmendi Arozena And.ek aurkeztutakoa.-

Iradokizunaren edukia

Aurkeztutako iradokizunak alde batetik 1982ko urriaren 22an hartutako akordioa kontutan hartu behar dela gogorarazten du, Hiribarren kalean espalo bat burutzeko egindako zehaztatze aprobatxamendu aitortpenari buruzkoa; bigarrenik arearako proposatutako dentsitatea baxua dela iruditzen zaiela adierazten dute; eta hirugarrenik gunerako proposatutako hirigintza karga gehiegizkoa dela ulertzen dute -zubi berria eraikitzea-.

Kontsiderazioak

Orain 22 urte hartutako akordioaren aitorpenari dagokionez esan berau kontsideratzea edo ez bere egunean gunea garatzeko burutu beharreko gestioko proiektuari dagokiola eta ez planeamendu orokorrari.

Aprobetxamendua handitzea eta guneari dagozkion hirigintz kargak zehaztea behin-betiko dokumentua idazteko prozesuan aztertu eta gauzatuko dira.

Ondorioa

1982ko urriaren 22an hartutako akordioaren aitorpena kontsideratzea edo ez gestioko proiektura geroratzea proposatzen da, eta era berean, guneko behin-betiko aprobetxamendua eta hirigintz kargak haserako onarpenerako dokumentura geroratzea.

10 zbk.dun iradokizuna. Jose Manuel Insausti Olariaga Jn.ak aurkeztutakoa.-

Iradokizunaren edukia

Aurkeztutako iradokizunari erantsitako planuan industrial bezala adierazitako lursailak barneratzea proposatzen da.

Kontsiderazioak

CAF atzealdean kokatutako zenbait lursail dira, ibilgailuentzat sarbide ezegokia dutenak, eta industrial bezala kontsideratzeak industri guneko handiago baten zati balira bakarrik izango luke justifikazioa.

Ondorioa

Aurkeztutako iradokizuna ezestea proposatzen da.

11 zbk.dun iradokizuna. Kele Lasa Aiestaran Jn.ak aurkeztutakoa.-

Iradokizunaren edukia

Aurkeztutako iradokizunean AIU5-erako proposatutako antolaketa birkontsideratzea proposatzen da, etxebizitza dentsitate handiagoa emanez.

Kontsiderazioak

Aurkeztutako iradokizunari buruz esan proposatutako antolaketak soilik izaera indikatiboa duela, eta eskatutako aprobetxamendu gehitzea behin-betiko dokumentua idazterakoan aztertu eta zehaztuko dela.

Ondorioa

Guneari behin-betiko aprobetxamendua zehaztea haserako onarpenerako dokumentura geroratzea proposatzen da, eta eraikinaren formaren definizio zehatza garapen planeamendura geroratzea.

12 zbk.dun iradokizuna. Joakin Irizar Garmendia Jn.ak aurkeztutakoa.-

Iradokizunaren edukia

Aurkeztutako iradokizunean AIU5erako aurrikusitako dentsitatea birkontsideratzea eskatzen da, AIU4 eta AIU6rako aurrikusitakoetara gerturatzeko.

Kontsiderazioak

Adierazitako iradokizunaren inguruan esan eskatutako aprobetxamendu gehitzea behin-betiko dokumentua idazteko prozesuan aztertu eta zehaztuko dela.

Ondorioa

Guneko behin-betiko aprobetxamenduaren zehaztapena haserako onarpeneko dokumentura geroratzea proposatzen da.

13 zbk.dun iradokizuna, Jose Lasa Galparsoro, Miren Dorronsoro Imaz, Francisca Arroyo Gago eta Francisco Garcia Calero Jn./And.ek aurkeztutakoa.-

Iradokizunaren edukia

Aurkeztutako iradokizun idatzian bere partzelarako aurrikusitako eraikigarritasun bolumena aldatzea eskatzen da, dirudienez, garajea eraikitzeke helburuarekin, beste zenbaitetan ezestua izan den gaia.

Kontsiderazioak

Arauen Aurrerapen Agiriak hasera batean eraikina kontsolidatzea proposatzen du, indarrean dagoen hirigintz planeamenduarekin bat bait dator, eta azkenaldian inguruan burutu diren garapenekin koherentea da hirigintza ikuspegitik.

Halaere AIU3-ari dagokion gunea berraztertzea proposatzen da, guneari osoko irtenbidea emateko, eta ez iradokizuna burutzen duenaren jabegokoa den partzelari bakarrik.

Bestalde gogorarazi eraiki berri den ondoko eraikineko sotoetan garajeak dituztela.

Ondorioa

AIU3-ren osoko antolaketa beraztertzea proposatzen da, antolaketa eta gunearen aprobetxamenduak behin-betiko dokumentura geroratuz.

14 zbk.dun iradokizuna, Jose M^a Jauregik aurkeztutakoa -Pingon S. Coop.-

Iradokizunaren edukia

Aurkeztutako iradokizunean PINGON S. COOP. enpresaren aurrealdean proposatutako bigodegorria kentzea proposatzen da, Hiribarren kalean, txirrindularientzat istripu arriskua suposatuko bait luke, eta bestalde enpresa beraren jarduerari ere modu larrian eragingo bait lioke.

Kontsiderazioak

PINGON S. COOP.ren fatxadaren aurrealdetik Hiribarren kaleko galtzadaren ertzero arte egun 8 metro daude, eta enpresaren aurretik igarotzen den espaloi ertzetik puntu berdina arte -maniobren gunea- 6,5 metro daude.

Jendaurrean erakutsitako dokumentuko irtenbidean, zein Berrikuspen dokumentuaren helburu eta kriterioen aurrerapen bat soilik den, enpresaren egungo aurrealdea bidegorri batekin okupatzea proposatzen da, eta gainera, espaloi batekin, gaur egun Hiribarren kaleak ez dituen elementuak, eta Lazkao eta bere garapen berrien lotunea Beasainekin egoki burutzeko erabat beharrezkoak. Zentzu honetan enpresarako sarbideak zuzenean Hiribarren kaletik egitea proposatzen da.

Edozein kasutan, bidegorri eta espaloiaz gain, AIU3 eta AIU5 ondoko guneeetan proposatutako erreka ertzeko pasealekua luzatzeko aukera aztertu beharko da, enpresaren atzealdetik, idatzi beharreko behin-betiko dokumentuan zehaztasun gehiagoz definitu beharreko elementua.

Ondorioa

Aurkeztutako iradokizuna ezestea proposatzen da.

15 zbk.dun iradokizuna. Joakin Agirre Garin Jn.ak aurkeztutakoa.-

Iradokizunaren edukia

Aurkeztutako iradokizunean GI-120 errepidearen trazadura eta errotonda berria burutzea AIU6-aren urbanizazioko karga bezala kontsideratzearekin ezadostasuna adierazten da, 10 eta 12 H.A.ak eta 1. Sektoreko Arauen Aldaketaren izapidatze prozesura zuzenduz, eta adierazitako obrak finantzatzeko AIU6-ko jabekideen ezezkoa berretsiz.

Era berean, AIU5 "Hiribarren" eta AIU9 "Komendradi" guneeetarako aprobetxamendua gehitzea eskatzen du, 2 guneeetarako proposatutako dentsitateak baxuak direla ulertuz.

Kontsiderazioak

Lehenengo gaiari dagokionean esan, berau 10 eta 12 H.A.k eta 1 Sektoreari buruzko Arauen Aldaketa izapidatzeko prozesuan aztertu zela, eta jendaurrean erakutsitako dokumentuak hirigunea zatitzen den gunea ezberdinei dagozkien urbanizazioko kargen esleipenari buruzko aipamenik ez duela egiten, Aurrerapen dokumentu bat delako, non proposatutako hiri modelu berriaren kriterio eta helburuak soilik adierazi behar diren, eta ondorioz gai hori aztertzeko testuinguru egokia ez dela ulertzen da, bestalde, lehen ere aztertua izan den gaia.

Adierazitako bigarren gaiari dagokionez esan eskatutako aprobetxamendu gehitzeak behin-betiko dokumentua idazteko prozesuan aztertu eta zehaztuko direla.

Ondorioa

Aurkeztutako lehenengo gaia ezestea proposatzen da, Aurrerapen Agiriaren edukia gain-ditzen duen gai bat delako, eta AIU5 “Hiribarren” eta AIU9 “Komendradi” guneen aprobetxamenduaren zehaztapena haserako onarpeneko dokumentura geroratzea.

16 zbk.dun iradokizuna, Jose Maria Etxeberria Jn.ak aurkeztutakoa.-

Iradokizunaren edukia

Aurkeztutako iradokizunean AIU5erako aurrikusitako dentsitatea gehitzea eskatzen da, AIU4 eta AIU6rako aurrikusitakoen antzekoekin.

Kontsiderazioak

Adierazitako iradokizunari dagokionean esan eskatutako aprobetxamendu gehitzea behin-betiko dokumentua idazterakoan aztertu eta zehaztuko dela.

Ondorioa

Guneko behin-betiko aprobetxamendua haserako onarpenerako dokumentura geroratzea proposatzen da.

17 zbk.dun iradokizuna, Josefina Lizarraga Lizarraga And.ak aurkeztutakoa.-

Iradokizunaren edukia

AIU20tik igarotzen den bide berriaren mendebaldean kokatutako lursailak hirilur bezala kalifikatzea proposatzen da, aipatu gunean barneratutakoen ezaugarri berak dituztelako.

Kontsiderazioak

Gaur egun “Zubizkitza” -AIU19- mendebaldetik igarotzen den bidea ertzeko bidea da, non bere egunean alde batean bakarrik eraikitzea proposatzen zen, beste aldera mendiarekin muga eginez.

Aurrerapen dokumentuan bide honi jarraipena ematea proposatzen da, eta proposamene-ko bide trama orokorrarekin lotzea, egungo bidearen ezaugarriak mantenduz eta hiri hazkundearekiko ertza eta muga egiten duen elementuan bihurtuz.

Zentzu honetan eta planteamendu honekin, ez da egoki ikusten proposatutako iradokizuna onartzea, bidearen mendebaldean kokatutako lursailetan sartzea suposatuko bait luke, hasera batean gorde egin nahi den mendi-hegala.

Ondorioa

Aurkeztutako iradokizuna ezestea proposatzen da.

18 zbk.dun iradokizuna, Jose Antonio Gorostizu, Jose Ignacio Insausti Jauregi, Javier Insausti Jauregi, Magdalena Fernandez Diaz de Otazu, Karmelo Zabalegi Vitoria, Francisca Laborde Abasolo, Iñigo Aranburu Izagirre eta Nerea Loyarte Garmendia Jn./And.ek aurkeztutakoa.-

Iradokizunaren edukia

Aurkeztutako iradokizunak bariantearen erdiko errotonda Lazkaomendirako bidegurutzean birkokatzea proposatzen du.

Kontsiderazioak

Azaldutako gaia 10 eta 12 H.A.k eta 1. Sektoreko Arau Subsidiarioen Aldaketa dokumentuaren izapidatze eta onarpen prozesuan aztertu eta baloratu da, adierazitako puntuan errotonda ezartzeak, herrigunera sarrera zuzenegia suposatuko lukeela ulertuz -gune honen joera bestalde oinezkoentzat bihurtzea izanik-, eta herrigunerako trafikoa, kriterio eta helburu orokorren aurka bideratuz. Bestalde, 10 eta 12 H.A.tako sarbidea eta ibaiaren ezker aldean aurrikusitako garapenarekin bide lotunea ez lirateke behar bezala antolatuta geldituko, eta ondorioz, aipatu errotondaren kokapen egokiena 10 eta 12 H.A. inguruetan dela ulertzen da.

Ondorioa

Aurkeztutako iradokizuna ezestea proposatzen da.

Bestalde, eta uztailaren 22ko 183/2003 Dekretuan xedatutakoa jarraiki, ingurumenaren gaineko eraginaren alde aurreko txosten eskaera egin zitzaion Gipuzkoako Foru Diputazioari. Horretarako, Lazkaoko Arau Subsidiarioetako Berrikuspenaren Aurrerapen dokumentuarekin batera, honen ingurumenaren gaineko eraginaren baterako ebaluazio-azterketa egin eta bidali zen Gipuzkoako Foru Diputaziora.

Gipuzkoako Foru Diputazioko Garapen Eramangarrirako Departamentutik Ingurumen eraginaren alde aurreko txostena jaso da, eta beste zenbait erakundeetatik beraien txostenak ere bai.

Beste alde batetik eta abantze dokumentuaren aurrean zera konstarazi nahi da:

- Mugatutako hainbat guneetako buruz dokumentuan jasotzen diren zehaztapenak, hauei buruz ematen den azken emaitzaren arabera egokitu ahal izango dira behin betiko dokumentuan.
- Analisi sakonago baten ondorioz lortutako emaitzen arabera, haserako onarpena jarriko den proiektuak sailkapen eta planifikazioari buruzko zehaztapenak birmoldatu ahal izango ditu.
- Indarrean dagoen Arauean 10-12 H.A. izenarekin izendatzen den guneari dagokionean, hau egun izapidatzen ari den aldaketa puntualean ondorioztuko diren zehaztapenetara egokituko da.

Guztia honen ondoren eta Hirigintza Batzordearen proposamenez, Udal Osoko Bilkurak honako erabaki hauek hartzen ditu:

1. Jendaurreko erakustaldian jasotako iradokizunak txosten teknikoan proposatu moduan estimatu, desestimatu eta ebaztea.

2. Planeamenduko Arau Subsidiarioen berrikuspenaren erizpide, helburu eta irtenbide orokorrak onartzea.
3. Idazle teknikariei, estimatutako iradokizunak hala nola ingurumen eraginaren alde aurreko txostenak kontutan izanik proposamen dokumentua idatz dezaten agintzea.

VI.- FUTBOL ZELAIKO BIRMOLDAKETA ETA ALDAGELEN PROIEKTUAREN HOBEKUNTZAK.-

Udal Osoko Bilkurak, 2004ko apirilaren 6an egindako batzaraldian, futbol zelaiko lanen esleipena Miguel Imaz, S.A.ri egitea erabaki zuen 529.999,03 €tan. Lanen burutzea aurrera doan einean, proiektuaren 2. faseari dagozkion zenbait lan orain egitearen egokitasuna ikusi da eta hori horrela honako kontzeptu berri eta zenbatekoak onartzea planteatzen da, lehen onartutako proiektuaren hobekuntza gisa:

Futbol zelaiko proiektuaren hobekuntza gisa saneamenduaren hobekuntza, atletismoko pistaren buelta guztian kanaleta jarritz; harresiko urak jasotzea; futbol zelaiaren inguruan bi metroko espaloia egitea; futbol zelaiko argiteria. Guzti honen kostua 104.567,11 euroakoa da.

Aldageletako proiektuaren hobekuntza gisa aldegeletan gradak jartzea eta aldageletako zoruaren aldaketa. Guzti honen kostua 66.437,88 euroakoa da.

Osoko Bilkurak, gaia aztertu ondoren eta bertaratutako bere partaide guztien aldeko botuekin, hobekuntza hauek onartzea erabakitzen du.

VII.- KREDITU GEHIGARRI BIDEZKO 4 ZBK.DUN KREDITU ALDAKETA ESPEDIENTEA.-

Udal honetako Aurrekontuari eragiten dion kreditu gehigarrien bidez egin beharreko kreditu aldaketarako espedientea irakurri da.

Idazkari-Kontuhartzaileak egindako txostenak dioenez, aipatutako espedientea aplikagarria zaion araudiari egokitzen zaio, eta zehazki Udal Entitateen Aurrekontuei buruzko abenduaren 19ko 21/2003 Foru Arauaren 34. artikuluan eta Udal Entitateen Aurrekontu Erregelamendua onesten duen abenduaren 1eko 96/1992 Foru Dekretuaren 40. artikuluan ezarritako beharkizun eta tramiteei.

Era berean, Ogasun Batzordeak egindako aldeko txostena eta onespen proposamena irakurri dira.

Alkateak esaten du kreditu aldaketa honen xedea aurreko puntuan onartu den futbol zelaiko lanen hobekuntzak burutzea dela.

Eztabaidatu ondoren botutara jarri eta bertartatutako guztien aldeko botuarekin honako hau

ERABAKI DA

Lehenik.- Udal honen aurtengo ekitaldiko Aurrekontuari eragiten dion kreditu gehigarrien bidez egin beharreko 4 zbk.dun kreditu aldaketarako espediente onestea, proposamenaren eta ondoko kapituluko laburpenaren arabera:

KREDITU GEHIKUNTZAK

Kapituluak	Izena	Gehikuntzak
VI	Inbertsio errealak	175.000,00 €
GEHIKUNTZAK GUZTIRA		175.000,00 €

FINANTZATZEN DITUZTEN BALIABIDEAK

Kapituluak	Izena	Zenbatekoa
VIII	Diruzaintzako gerakina	175.000,00 €
GUZTIRA		175.000,00 €

Bigarren.- Jendaurrean ikusgai jartzea, erreklamazioen ondorioetarako. Erreklamaziorik aurkezten ez bada, erabaki hau behin-betikotzat joko da. Espediente honi Aurrekontu Orokorra onesteko ezarritako gainerako tramiteak eman beharko zaizkio.

VIII.- .- FUTBOL ZELAICO BIRMOLDAKETA ETA ALDAGELEN 4. ZERTIFIKAZIOAK.-

Arizti Haundi Futbol Zelaiko Birmoldaketa eta Aldagelak proiektuaren obra zuzendaritzak lan hauen laugarren zertifikazioak luzatu ditu. Futbol Zelaiaren Birmoldaketa lanen laugarren zertifikazioa 42.136,55 eurotako da eta Aldagela proiektuaren laugarren zertifikazioa 13.986,09 eurotako.

Obra zertifikazio hauek udal teknikarien oniritzia jaso dute.

Hau kontutan izanda eta zertifikazio hauek aztertu ondoren, Udal Osoko Bilkurak, bertaratutako bere partaide guztien aldeko botuekin, zertifikazio hauek onartzea erabakitzen du.

IX.- JUANA IRIZAR IZA ANDEREAREN DOHAINTZA

Juana Irizar Iza anderearen sendiak udal honi jakin arazi dionez emakume honek bere testamentuan hemezortzi mila (18.000,-) euro utzi zizkion Udal honi, zaharrentzako lanetan eta arduetan erabiltzeko.

Emakume hau 2002ko azaroaren 26an hil zen eta 2004ko abuztuaren 30ean egin da herentzi partiketako eskritura.

Honen aurrean, Udalak, bertaratutako bere partaide guztien aldeko botuekin, zera erabakitzen du:

1.- Juana Irizar Iza andereak egindako dohaintza onartzea, Alkatea ahalmen duz Udalaren izenean diru-kopuru hau jasotzeko dagozkion urratsak eman ditzan.

2.- Udal Osoaren partetik sendiari dohaintza honengatik eskerrik asko ematea eta aldi berean esker on hau, udalak dituen ohiko bideetatik argitaratzea.

X.- ALARGUNEN PENTSIOEI BURUZKO MOZIOA.-

Mozioak honela dio:

“Goierri eta Urola Garaiko Jubilatuen egoitzak, Goierri eta Urola Garaiko Caritas, Legazpiko, Zumarraga-Urretxuko, Beasaingo eta Ordiziako Nagusilan elkarteak, Lazkaoko AZKI, Beasaingo ASMUBE, Ordiziako KIMETZ, Legazpiko IRATZARRI eta Urretxu-Zumarragako MAIRI emakumeen elkarteak, Urola Garaiko ERALDATZEN elkarteak eta GUESKE (Goierri eta Urola Garaiko ESPERIENTZIA-ESKOLAko ohizko ikasleak.).

Goian aipatutako elkarteek, alarguntzako pentsioen inguruan egun dagoen araudiak sortu duen gizarte mailako arazoaren aurrean, ondoko eskaria aurkeztu nahi diogu LAZKAOKO Udalar, honako gogoetan oinarrituta.

GOGOETAK:

1. Emakume alargunen egoera soziala erabat larria da. Emakume-talde horretako gehienak alarguntzako pentsioaren menpe daude ekonomikoki, bere bizitzaren urte asko etxeko lanetara bakarrik dedikatu direlako. Alarguntzako pentsio gisa ezkontideari zegokion pentsioaren %52 jasotzen dute. Baina mantentze-gastuak handiagoak dira (etxebizitza, argindarra, etxe-komunitatearen gastuak ...) eta gastu horiek berdinak dira pertsona bakarra izan edo bi.
2. Egoera hori larriagoa da adinean zaharragoak diren emakumeen kasuan, beraien senarrek jasotzen zuten pentsioak dagoeneko oso txikiak zirelako eta orain gutxieneko pentsioa jasotzen dute: 411,76 €.
3. Eusko Jaurlaritzak 65 urtetik gorako pertsona baten pobretasun-atalasea 511 €rotan (86.000,- pta.) dagoela uste du.
4. Gutxieneko diru-kopuru horrekin bizi dira isil isilik emakume alargun asko; sarritan ezkutatu egiten dute egoera larri hori lotsaz eta horrek jaitziera nabarmena suposatzen du beraien bizitza-statusean.

Gure gizarte oparo eta aberatsean dagoen azpi-gizarte ikusezina da baina arazo larriak dituen: elikadura-arazoak, hotza, ... eta egoera horrek sortzen duen larritasuna.

5. Gizartekintzak diogen bezala, bakarrik bizi diren adineko pertsonen %82 emakumeak dira. Eta gehiago ere esaten du: “ ... bakarrik bizi diren eta adinez zaharragoak diren

emakume alargunen kolektiboan antzematen dira pobretasun-egoera nabarmenak eta ongizate-eza.”

Egoera horrek, gainera, disfuntzioak sortzen ditu gizartea laguntzeko sistemetan, hala nola, baliabide alternatiboak eskatzean (kostu handiko egoitzetan tokia eskatuz adibidez); eta modu horretan gastu soziala izugarri igotzen da.

Goierriin 2.205 emakume alargun daude, Urola-Garaian 1.334, Gipuzkoan 37.552 ...

HAUSNARKETA

Egoera horren aurrean, gizarteak erantzun egokia eta neurrizkoa eman behar du baina, horrezaz gain, aldi baterako den irtenbide bat proposatu behar du; izan ere, emakumea lan-merkatura sartzearen ondorioz bi ezkontideen ahalmen ekonomikoa hobetzea ahalbidetu da.

Gipuzkoako Plan Gerontologikoak arlo horretarako helburu nagusiak ezarri ditu. Ikus dezagun:

- A. Komunitatean integratzea, pertsonak beraien etxeetan ahalik eta denbora luzeenean bizi daitezen ahalbidetuz.
- B. Adinagatiko diskriminazioaren aurka borrokatzea, elkartasuna eta giza-talde horren kohesio soziala indartzea, programa sozio-sanitarioetan, hezkuntza arlokoetan ... parte har dezan ahalbidetuz.
- C. Oinarrizko gizarte zerbitzuak indartzea: errealitatea ezagutuz eta aztertuz, banakako arreta-planak kudeatzea ahalbidetuz.
- D. Bizi-baldintzak hobetzea, gutxieneko diru-sarrerak bermatuz, hainbat etxe zaharretan dauden arriskuak eta osasunerako kaltegarriak diren gauzak saihestuz, ... eta abar.

ONDORIOA

Hala ere, eta gizarte-mailako eskaria egon arren, horrelako gauzak ez dira aldatu eta ez dira emakume alargunen egoera hobetuko dituzten erabakiak hartu.

Arazo hori larria dela esan dute hainbat erakundek (Nafarroako Gobernua, Kataluniako Generalitatea, Andaluziako Autonomia Elkartea) eta dagoeneko laguntza batzuk ezarri dituzte pentsio eskas horiei aurre egiteko.

Eskari hau izenpetzen duten elkarteek gure erakundeek eskari honi erantzun egin behar diotela uste dute. Egoera hori jasaten duten pertsonen gertuko elkarteak garen aldetik eskaera honekin arlo honetako jarduteko eskumena duten erakundeen inplikazioa (beste autonomia elkarteek egin duten bezalaxe) bilatu nahi dugu.

Horregatik, ondoko eskaria luzatzen diogu LAZKAOKO Udaletxeko Osoko Bilkurari:

1. Subsidiarioki arazoa konpontzeko eskumena duten erakundeei (batik bat, Gipuzkoako Foru Aldundiari, Eusko Jaurlaritzari, Eusko Legebiltzarrari eta Gipuzkoako Lurralde

Historikoko Batzar Nagusiei) honako eskaria egin diezaiela: etxebizitza besterik ez duten emakume alargunei pixkanaka beraien pentsioa osatuko duten formulak bidera dezatela eta osagarri bat gehi diezaiotela kopuru honetan: lanbide arteko gutxieneko soldataren (460,50 €) 1,5ari dagokiona, harik eta hileko pentsioa 691 €urokoa izatera iritsi arte.

2. Halaber, Euskadiko gure komunitateko erakunde horiek eskaria luza diezaietela estatuko beste erakundeei, hala nola, Gizarte Segurantzako Institutu Nazionalari eta Gobernu Zentralari, izenpetzen duten elkarteek eskatutako eran alarguntzako pentsioak egunera ditzaten.
3. Udalak, eskari hori onarturik, aipatu erakundeei jakinarazteaz gain, hartutako erabakiaren berri herriari eman diezaiola gizarte-mailako arazo larri horretaz herritarrek sentsibilizatuz eta egoera horretan dauden adineko pertsonen elkartasuna bultzatuz.”

Alkateak (EAJ-EA) esaten du gai honen azpian dagoen arazo nagusia gizarte segurantzaren eskuduntzan dagoela eta beraiek behin eta berriro esijitu dutela Autonomi Estatutuaren arabera dagokion gizarte segurantzaren eskuduntzaren trasferentzia baina oraindik ere gaur egun hau Madriden esku dagoela. Esaten du baita ere mozioarekin bat egiten dutela eta udalaren esku dauden urratsak emateko prest daudela.

Serna zinegotziak (PSE-EE) mozio honi baiezkoa emango diotela. Esaten du ados daudela baita ere mozio honetan iradokitzen diren igoerak Madridi jakinaraztearekin eta hala egingo dutela. Esaten du baita ere harritu egin dituela Alkateak egindako argumentazioa eta gaineratzen du azpiko arazoa sarrera minimoetara iristen ez diren pertsonak direla eta ez eskuduntza transferitu gabe egotea, ze eskuduntza transferitu gabe duten beste autonomi elkarte batzuk neurriak hartu dituztela.

Alkateak erantzuten dio esanez, ez zaiola iruditzen mozio honetako eztabaidaren gaia hau denik baina, hasteko gizarte segurantzaren eskuduntza Madridena dela eta bestalde gustatuko litzaiokeela autonomi erkidegoetan ze neurri hartu diren, zer den saltzen dena eta zer den benetan egiten dena.

Olaso zinegotziak (PP) esaten du bere ustez eguneko gai zerrendan alargunen pentsioei buruzko mozioa jartzen duela eta hemen alarguntza pentsioei eta gerontologi egitasmoari buruz hitzegiten dela eta bi gauza ezberdin direla; gehitzen du gerontologi egitasmoa gizarte zerbitzuetan aztertu behar dela.

Alkateak erantzuten dio mozioaren ondorioetan eskatzen dena alarguntzako pentsioen eguneraketa dela eta ez beste ezer.

Olasok esaten du Ibarretxe Plana onartu edo ez kudeaketa egiten jarraitu beharrean gaudela, Madriden egiten duen ala ez zai egon gabe eta subsidiarietatean oinarria jarraituz.

Une honetan Inazio Estensoro zinegotzia bertaratu da.

Gaiaren inguruan eztabaida zabal baten ondoren, mozioa bozketan jartzen da eta Osoko Bilkurak, bertaratutako bere partaide guztien aldeko botuekin, berau onartzea erabakitzen du.

XI.- EMAKUNDEREN MOZIOA.-

Mozioak honela dio:

“ADIERAZPEN INSTITUZIONALA

2004ko azaroaren 25ean Emakumeen Aurkako Indarkeriaren Kontrako Nazioarteko Eguna dela-eta, udal honek honako ADIERAZPENA plazaratzen du:

- Emakumeen aurkako indarkeriak haien giza eskubideak eta funtsezko askatasunak urratzen eta zapaltzen dizkie.
- Indarkeria honen sorburua emakumeen bazterketa estrukturalean datza, bizitzaren eremu guztietan gertatzen dena. Indarkeria mota hau bazterketaren adierazpide soil bat baino gehiago da: bazterketari eusteko ezinbesteko kontrol sozialeko tresna, alegia.
- Emakumeen aurkako indarkeria ekidin egin daiteke, jarduketa eta politika ezberdinen bidez zenbait balore sustatuz: sexuen arteko berdintasuna; emakumeen autonomia eta ahalmen politiko, ekonomiko eta soziala indartzea; eta gatazkak konpontzeko bide baketsuen erabilera.
- Emakumeen aurka indarkeria erabiltzen dutenek jakin behar dute legeak horrelako ekintzak zigortzen dituela eta gizarte honek ez duela horrelako jokabiderik onartzen.
- Indarkeria honen biktimek gure gizartearen elkartasuna eta hurbiltasuna sentitu behar dituzte. Indarkeriaren gorpil zorotik irteteko behar dituzten baliabide material eta pertsonalak eskaini behar dizkiegu, bizimodu berri bat ekin ahal diezaioten.
- Aspaldion konpromiso politiko, sozial eta instituzionala nabarmen indartu da, gizartearen gaitz hau erauzteko helburuarekin. Halere, oraindik bide luzea dugu egiteko.
- Udal administrazioak oinarritzko papera du, bai emakumeen aurkako indarkeria prebenitzen, bai biktimei laguntzen eta arreta egiten. Izan ere, udalerrria da indarkeria hau gauzatzen den eremu fisikoa. Gainera, bere antolakuntzari esker, udala da gizarte arazo honetatik eta zerikusia duten pertsonetatik hurbilen dagoen instituzio publikoa.

Horregatik guztiarengatik, udal honek, batetik KONPROMISOA hartzen du, bere eskumenen barruan, emakumeen berdintasunaren alde eta euren aurkako indarkeriaren kontra udal politika aktiboa izateko. Bestetik, udalerriko emakumeak (eta batez ere gizonak) indarkeria honen aurkako jarrera aktiboa azaltzera ANIMATZEN DITU, indarkeria hau ez onartuz, isilik ez geldituz, biktimei lagunduz eta, bereziki, azaroaren 25ean deitzen diren ekitaldietan parte hartuz.”

Alkateak (EAJ-EA) esaten du mozioarekin bat egiten dutela eta dauzkaten eskuduntzen barruan neurriak hartu eta baliabideek jartzeko konpromezua hartzen dutela.

Serna zinegotziak (PSE-EE) esaten du beraiek ere ados daudela mozioarekin.

Olaso zinegotziak (PP) esaten du bera ere ados dagoela mozioarekin baina bi puntualizazio egin nahi lituzkeela, bat, desberdintasuna dagoela baina desberdintasun hori gizarte politika egokiak falta direlako dela, heziketa falta dagoela eskoletan, ikastetxeetan; eta bi, oso zaila dela sexuen arteko berdintasuna lortzea baina benetan garrantzitsua dena giza eskubideetan berdintasuna lortzea dela, pertsonen duintasunean berdintasuna lortzea.

Guzti honen ondoren mozioa bozketan jartzen da eta Osoko Bilkurak, bertaratutako bere partaide guztien aldeko botuekin, berau onartzea erabakitzen du.

XII.- GALDERA ETA ERREGUAK.-

Alkateak esaten du abenduko osoko bilkura aurreratu egingo dela eguberriak direla eta, oraindik zehatz ze egunetan izango den ez badaki ere.

Olaso zinegotziak (PP) esaten du 4, 5 eta 6. puntuei buruzko dokumentaziorik ez duela jaso.

Alkateak erantzuten dio dokumentazioa bidaltzen saiatzen dela, dena den norbaitek zerbait falta duela iruditzen bazaio idazkaritzara jo behar duela.

XIII.- BILERAREN AMAIERA.-

Eta eztabaidatzeko beste gairik ez dagoenez, Alkateak bilera amaitutzat jotzen du, iluntzeko zortzi terdiak direnean nik, Idazkariak, guztiaren akta jaso eta ziurtatzen dudarik.